

## 舒城七步堂族谱序

己丑腊月，安阳西高穴发丘得东汉大墓，以为魏武高陵，天下哗然，疑者甚众。墓所出一男二女之骸骨，或曰可验其基因，以证其魏武之遗。然持之者谢以魏武基因无以佐证者。不知以天下之大，当年曹魏之盛，岂无后焉？吾等遂索之天下，应者云集，得谱凡数十。中有七谱言魏武之脉苗苗，验其基因则可知其真伪矣。人之基因，受诸父母，父母成分相杂而后传诸子孙，凡数代则不可溯其源矣。唯基因中之男性染色体者，女性所无，故得父系代代相传，可谓家族之信标也。天下男性染色体型号繁多，种族民系各各不同，凡廿类千余型。魏武七谱之族，为帝诸子之后，失散千年而流诸四海，北至辽东，南越岭表，东则江淮，西跨洞庭，不知彼此久矣。今验其基因，则有六族之男性染色体共为一型，且该型罕见于他族。更估其岁几两千年矣，足证六族实为魏武之后。庚寅暮春，舒城曹友平为修此谱，来函请验基因，何其明者。舒城曹氏人丁兴旺，各房各支咸来验查，竟得五型。核之则海内曹姓之五主流也，曰魏武氏，曰邾曹氏，曰曹姬氏，曰江东越人曹氏，曰满洲曹氏。盖舒城四通之地，古之流民南来北往，屡有定居于舒者。五曹之族陆续来舒，久之合为一族，胼手胝足，守望相助，遂为真兄弟矣。今者七步堂新谱即修，以基因之数据重订谱序，是唯基因家谱也。夫基因家谱者，天下未尝有闻，而海内首例也。开此先河，盖因曹氏之明，吾等之力，而天下修谱者之幸也。